

Tut sin ina carta

Proximamein termimescha *Annina Tomaschett* la scola da recruta dil sport d'elita a Magglingen. Allura suonda per la giuvna tiradura da Trun ina nova fasa dalla veta. Ella ei numnadamein sedecidida pil tir sco professiun. Dapi l'entschatta da quest onn eis ella commembra dalla gruppera da Swiss Shooting che sa separticipar a concurrenzas internaziunalas e naven dil settember eis ella ella gruppera dil Center da prestaziun naziunal. Quei ei la secund'aulta gruppera el cader dall'associaziun da tir svizra. Da lu naven habitescha e trenescha ella a Biel. Annina Tomaschett ei vegnida promovida sin fundament dils fetg buns resultats dils davos meins. El match da treis posiziuns sur la distanza da 50 meters s'auda ella denter las meglieras Svizras. (fmr/hh)

Cu la pissiun daventa professiun

Naven dil settember ei il tir buca pli «mo» il hobbi d'Annina Tomaschett da Trun, mobein era la professiun. Da lu naven seconcentrescha ella cumpleinamein sin buis e schiba. Pusseivel ei quei cun sustegn finanzial da Swiss Shooting, mo surtut era dils geniturs e sponsurs: «Autr'uisa mass ei buca da viver dil tir.»

Hans Huonder/FMR

Il tir ei aschidadir vegnius mess en tgina alla tiradura ch'ei carschida si a Campliun. Bab ed augs ein tiradurs e catschadurs cun tgiert ed olma. Per quei motiv fa ei buca surstar che *Annina Tomaschett* ei vegnida beinspert en contact cun quei sport fascinont e pretensius. Ella ei semeglierada cuntuadamein, era grazia a sia perseveronza e buca il davos era pervia dil sustegn da geniturs e fargliuns. Dapi l'entschatta da quest onn eis ella commembra dalla gruppera da Swiss Shooting che sa separticipar a concurrenzas internaziunalas. Sulet aunc duas gruppas dall'elita ein pli aultas: Quella dils tiradurs che separticipeschan a tirs dil Cup mundial, respectivamein quella dil Center da prestaziun naziunal. A quella dil center da prestaziun appartegn Annina Tomaschett naven dil settember e naven da lu eis ella miez-profi da tir. En vesta a quella promoziun va era la scola da recruta dils sportists d'elita a Magglingen a fin. Quella ha la giuvna tiradura da Trun absolviu uonn. El cader d'elita da Swiss Shooting eis ella dil reminent buca la suletta Grischuna: Era *Valentina Caluori* da Razén e *Lars Färber* da Favugn s'audan tiels megliers tiradurs dalla Svizra.

Buca lunsch naven dil record svizzer

Avon dus onns ha *Nina Christen* che ha gudignau la medaglia d'aur e da bronz als giugs olimpics a Tokio, sittau il record svizzer da 1184 puncts el match da treis posiziuns sin 50 meters al Campionadi d'Europa a Bologna. Ils resultats d'Annina Tomaschett da quest onn ein vegni fetg datier a quei record: «Miu record personal ei 1179 puncts. Il scopo ei da setener sur 1175 puncts e lu ei la finamira da vegnir ella gruppera dil Cup mundial buca lunsch naven. Per contonscher la promoziun drovel jeu uonn tschun resultats sur 1173 puncts, quater ga ei quei gia reussiu.» Pil success el Cup mundial ein resultats regulars sur 1180 puncts necessaris. Cun 21 onn ei Annina Tomaschett aunc fetg giuvna, ils megliers onns sco tiradura vegnan pér: «Normalmein ei quei ella vegliadetgna da 25 ni 26 onns.» Naturalmein che giugs

olimpics ein a «liunga vesta» in dils siemis dalla tiradura sursilvana che ha empriu da pictura: «Nina Christen ei ina buna camerata da mei. Dad ella survegn jeu era adina puspei buns cussegls. Siu success uonn ha secapescha fatg grond plascher e dat era motivaziun d'era contonscher enzacu la qualificaziun per Olympia.» Che Annina Tomaschett ha fatg uonn in grond svilup muossan ils resultats: «Enteifer in onn hai jeu saviu meglierar miu record el tir da treis posiziuns da 1158 sin 1179 puncts.» Per semeglierar vinavon drovi ei ussa buca mo in exercezi endinai e bia disciplina, mobein era pazienzia.

Mintga di el stan da tir

Naven dil settember viva e «lavura» Annina Tomaschett a Biel. Ensemen cun auters tiradurs parta ella buca mo il stan da sittar leu, mobein era la habitaziun che vegn messa a disposiziun da Swiss Shooting, la federaziun svizra da tiraduras e tiradurs. Schegie ch'ella ei miez-profi tenor il status dalla federaziun da tir, dedichescha ella tonaton igl entir di al tir: «Da dis normals essan nus denter siat ed otg uras el stan da tir. Ei dat denton era dis cun auter sport, per aschia haver in bien equiliber e secapescha era trenar la condizion. El stan da tir sa ei esser ch'ei vegn sittau in match cumplein cun 120 siets ni lu era in program pli cuort. Il trenement pertucca era optimaziuns, per exempl dall posiziun, ni lu era trenaments da schetg.» La stad ei il focus sil tir da 50 meters, denton senza metter la buis da 10 meters cumpleinamein dalla vart. Igl unviern eis ei il cuntrari. Ils trenaments succedan buca adina cun sustegn da trenaders: «Nus stuein era saver sevolver sezs. Ellas concurrenzas astgein nus era buca vegnir cussegliai dils trenaders.» L'atmosfera el cader seigi fetg emperneivla e colligala, quei che faciliteschi secapescha era il mintgadi: «Jeu sesentel fetg bein cheu.»

Bugen els cuolms

Che Annina Tomaschett sa insumma sededicar cumpleinamein al tir ei buca mo pusseivel pervia da Swiss Shooting che procura per infrastructura, trenaders e habitaziun, mobein era grazia als da casa: «Senza il sustegn finanzial dils geniturs e da sponsurs mass ei buca.» Luvrar regularmein spel tir professiunal ei strusch pusseivel: «Il focus, respectiv la concentratzion sto esser cumpleinamein sil sittar. Sch'ils patratgs ston aunc esser enzanua auter va ei buca.» Ina ga ni l'autra savessi ella tonaton s'imaginar da luvrar sporadic per fadigar enzacons daners. Sco equiliber pil tir e la veta a Biel appreziescha Annina Tomaschett las excursiuns a cuolm: «Sch'jeu haiel buca concurrenzas la fin d'jamna, sche vegnel jeu a casa. Jeu mon bugen en muntnoga a viandar, enzatgei che nus havein adina era fatg bia sco famiglia.» E co savess ei pomai esser auter sche bab, sora e frar van a catscha: «L'auter onn less jeu s'annunziar pigl examen da catscha. Quei ei era ina da mias finamiras.»